

**УЛСЫН БҮРТГЭЛИЙН ЕРӨНХИЙ ГАЗРЫН ДАРГЫН
ТУШААЛ**

2018 оны ... дугаар
сарын ...-ны өдөр

Дугаар ...

Улаанбаатар
хот

**Монгол Улсын иргэнд регистрийн дугаар шинээр
олгох, өөрчлөх, хүчингүй болгох журам
батлах тухай**

Иргэний улсын бүртгэлийн тухай хуулийн 5 дугаар зүйлийн 5.10 дахь хэсгийг үндэслэн ТУШААХ нь:

1.“Монгол Улсын иргэнд регистрийн дугаар шинээр олгох, өөрчлөх, хүчингүй болгох журам”-ыг хавсралтаар баталсугай.

2.Энэ журмын хэрэгжилтийг ханган ажиллахыг Иргэний улсын бүртгэлийн газар /Д.Энхцэцэг/-т үүрэг болгосугай.

3.Энэ тушаал гарсантай холбогдуулан “Журам батлах тухай” Улсын бүртгэлийн ерөнхий газрын даргын 2010 оны 6 дугаар сарын 04-ний өдрийн 331 дүгээр тушаалыг хүчингүй болсонд тооцсугай.

Гарын үсэг

МОНГОЛ УЛСЫН ИРГЭНД РЕГИСТРИЙН ДУГААР ШИНЭЭР ОЛГОХ, ӨӨРЧЛӨХ, ХҮЧИНГҮЙ БОЛГОХ ЖУРАМ

Нэг.Нийтлэг үндэслэл

1.1.Монгол Улсын иргэнд регистрийн дугаарыг шинээр олгох, өөрчлөх, хүчингүй болгоход энэ журмыг баримтална.

1.2.Монгол Улсын иргэн нэг регистрийн дугаартай байна.

1.3.Иргэний төрсөн он, сар, өдөр, хүйсийг үндэслэн регистрийн дугаарыг дараах байдлаар олгоно:

1.3.1. 2016 оны 01 дүгээр сарын 01-ний өдрөөс өмнө төрсөн иргэнд регистрийн дугаар олголтын дэвтрээс;

1.3.2. 2016 оны 01 дүгээр сарын 01-ний өдрөөс хойш төрсөн иргэнд иргэний улсын бүртгэлийн мэдээллийн сангаас.

1.4.Энэ журмын 1.3.1-д заасны дагуу регистрийн дугаар олгоход регистрийн дугаар олголтын дэвтэрт тухайн олгосон дугаарыг дугуйлж тэмдэглэнэ.

1.5.Регистрийн дугаар олголтын дэвтрийн багана нь сарыг, мөр нь өдрийг заах ба төрсөн сар, өдрийн огтлолцол дээрх 8 оронтой тоо нь тухайн иргэний регистрийн дугаарын тоон хэсгийг, 2 үсэг нь регистрийн дугаарыг олгосон аймаг, нийслэл, сум, дүүрэг, хилийн чанадад ажиллаж байгаа Дипломат төлөөлөгчийн газрыг илэрхийлнэ.

Хоёр.Регистрийн дугаарыг шинээр олгох

2.1.Регистрийн дугаарыг дараах тохиолдолд шинээр олгоно:

2.1.1.Монгол Улсын харьяат эцэг, эхээс шинэ төрсөн хүүхдэд;

2.1.2.эцэг, эхийн хэн нэг нь Монгол Улсын иргэн, нөгөө нь гадаадын иргэн, харьяалалгүй хүн бол тэдний дундаас Монгол Улсын нутаг дэвсгэрт төрсөн хүүхдэд;

2.1.3.эцэг, эхийн хэн нэг нь Монгол Улсын иргэн, нөгөө нь гадаадын иргэн, харьяалалгүй хүн бол тэдний дундаас гадаад улсын нутаг дэвсгэрт төрсөн хүүхдэд Монгол Улсын иргэнээр бүртгүүлэхээр эцэг, эх харилцан тохиролцож, тус тусдаа өргөдөл гаргасан бол;

2.1.4.Монгол Улсын Ерөнхийлөгчийн зарлигаар Монгол Улсын харьяат болсон иргэнд;

2.1.5.регистрийн дугаар авч байгаагүй Монгол Улсын иргэнд.

2.2.Энэ журмын 2.1.4-т заасан тохиолдолд Монгол Улсын Ерөнхийлөгчийн зарлиг, энэ журмын 2.1.5-д заасан тохиолдолд иргэний улсын бүртгэлийн эх нотлох баримт бичиг, гадаад улсад удаан хугацаагаар оршин сууж байсныг нотолсон

баримт бичиг, ял эдэлж байгаад суллагдсан тодорхойлолт, шүүхийн шийдвэрийн аль тохирохыг үндэслэнэ.

2.3.Энэ журмын 2.2-т заасан тохиолдолд улсын бүртгэлийн асуудал эрхэлсэн төрийн захиргааны байгууллагын иргэний улсын бүртгэлийн асуудал хариуцсан нэгж /цаашид “Иргэний улсын бүртгэлийн газар” гэх/ регистрийн дугаарыг олгоно.

Гурав.Регистрийн дугаарыг өөрчлөх

3.1.Иргэн регистрийн дугаараа өөрчлүүлэх хүсэлтийг аймаг, дүүрэг дэх улсын бүртгэлийн хэлтэст гаргах бөгөөд төрсний гэрчилгээнд дараах баримт бичгийн аль тохирохыг хавсаргана:

3.1.1.иргэний улсын бүртгэлийн эх нотлох баримт бичиг;

3.1.2.хүйс өөрчлөгдсөнийг нотолсон эмч, эмнэлгийн байгууллагын баримт бичиг;

3.1.3.шүүхийн шийдвэр.

3.2.Аймаг, дүүрэг дэх улсын бүртгэлийн хэлтсийн хяналтын улсын байцаагч энэ журмын 3.1-д заасан баримт бичгийг нягтлан шалгаж, өмнөх регистрийн дугаарыг хүчингүй болгох тухай дүгнэлт гаргана.

3.3.Аймаг, дүүрэг дэх улсын бүртгэлийн хэлтэс хяналтын улсын байцаагчийн дүгнэлт, ХААТР25 маягыг Иргэний улсын бүртгэлийн газарт ажлын 5 өдрийн дотор ирүүлнэ.

3.4.Иргэний улсын бүртгэлийн газрын улсын бүртгэгч хяналтын улсын байцаагчийн дүгнэлтийг үндэслэн цахим мэдээллийн санд өмнөх регистрийн дугаарыг хүчингүй болгож, регистрийн дугаарыг өөрчилнө.

3.5.Цахим мэдээллийн санд өөрчилсөн регистрийн дугаарыг баталгаажуулснаар иргэний улсын бүртгэлийн мэдээллийн сангийн дараах бүртгэлийн мэдээлэлд өөрчлөгдсөн регистрийн дугаарыг тусгана:

3.5.1.төрсний бүртгэл /ИУБ11, ХААТР11/;

3.5.2.гэрлэсний бүртгэл /ИУБ15, ХААТР15/;

3.5.3.гэрлэлт дуусгавар болсны бүртгэл /ИУБ16, ХААТР16/;

3.5.4.гэрлэлт сэргээсний бүртгэл /ИУБ15, ХААТР15/;

3.5.5.эцэг /эх/ тогтоосны бүртгэл / ИУБ14, ХААТР14/;

3.5.6.овог, эцэг /эх/-ийн нэр, өөрийн нэр өөрчилсний бүртгэл /ИУБ13, ХААТР13/;

3.5.7.үрчилсний бүртгэл /ИУБ12, ХААТР12/;

3.5.8.биеийн давхцахгүй өгөгдөл /гарын хурууны хээ/-ийн бүртгэл /ИУБ31/.

3.6.Иргэний улсын бүртгэлийн газрын улсын бүртгэгч хяналтын улсын байцаагчийн дүгнэлт, ХААТР25 маягыг улсын бүртгэлийн асуудал эрхэлсэн төрийн захиргааны байгууллагын иргэний баримтын архивт ажлын 3 өдрийн дотор хүлээлгэн өгнө.

3.7.Улсын бүртгэлийн асуудал эрхэлсэн төрийн захиргааны байгууллагын иргэний баримтын архив хүлээн авсан хяналтын улсын байцаагчийн дүгнэлт, ХААТР25 маягтыг ажлын 3 өдрийн дотор иргэний хувийн хэрэгт хавсаргана.

Дөрөв.Регистрийн дугаарыг хүчингүй болгох

4.1.Иргэний улсын бүртгэлийн газрын улсын бүртгэгч 2 буюу түүнээс дээш регистрийн дугаартай иргэний нэг регистрийн дугаарыг хүчинтэй үлдээсэн тухай хяналтын улсын байцаагчийн дүгнэлтийг үндэслэн цахим мэдээллийн санд регистрийн дугаарыг хүчингүй болгоно.

Тав.Бусад

5.1.Регистрийн дугаар шинээр олгох, өөрчлөх, хүчингүй болгох үйл ажиллагаанд улсын бүртгэлийн асуудал эрхэлсэн төрийн захиргааны байгууллагын орон нутаг дахь газар, хэлтсийн хяналтын улсын байцаагч, улсын бүртгэлийн асуудал эрхэлсэн төрийн захиргааны байгууллагын иргэний улсын бүртгэлийн, хяналт шалгалтын, мэдээллийн технологийн асуудал хариуцсан нэгж тус тус хяналт тавина.

---oOo---